



UKA16/104

20. oktober 2016

Kelly Berthelsen

Naalakkersuisut kingusinnerpaamik UKA2017-imi aalisarnermi raajat qaleruaannit kitosanimik tunisassiortumik pisortanit namminersortunillu pigineqartumik imminut akilersinnaasumik pilersitsinissamut toqqammaveqarnerseq misissuineramik saqqummiussinissaannut Inatsisartuni aalajangiiffigisassatut siunnersuut

(Inatsisartuni ilaasortaq Peter Olsen, Inuit Ataqatigiit)

Raajat qaleruaannik atorluannissamik Peter Olsenip Inuit Ataqatigiinneersup siunnersuutaa pillugu ima Inuit Ataqatigiinniit tapersiissuteqassaagut.

Siunnersuuteqartooq ilumoorluinnarpoq oqarami nunarput pisuussutinik ulikkaartoq. Ilumoorluinnarporlu aamma oqarami piumassuseqarnerusuuguttalu sutigut tamatigut immitsinnut pilersornerulersinnaassagaluartugut.

Ulloq manna tikillugu aalisakkanik qalerualinnillu tunisassiornitsinni, puisinniarnitsinni, savanik, tutunuk, umimmannik tunisassiornitsinni perlukorpasuaqartarpugut. Perlukorpasuit tunisassiarineqartarsimangillat periaatsit massakkorpiaq ilisimasavut atorlugit tunisassiorneq akilersinnaaneq ajormat.

Qujanartumilli ilaatigut Islandimiut allallu immap pisuussutaanik atorluannermut ilisimatusarlutik maligassiuillualersimammata perlukorisartakkatta atorfissaqassusiat, pingaartumillu tunisassiarinerisa akilersinnaassusiat paasineqariartuinnarpoq.

Taama iluatsitsillutik tunisassiorsinnaalernerannut misileraaneq ilisimatusarnerlu aqutissatuaapput. Uagut ulloq manna tikillugu tamakkuninnga aallutaqarsimangippallaarpugut. Silarsuullu sinnerani atorluannarup eqqumaffigineqaraluttuinnarfiani kingullikunngussanngikkutta maanna piffissanngorpoq misileraasalernissamut ilisimatusalernissamullu.

Qanortoq siunnersuut manna ilisimatusartuarluni imminut pilersornerujartuinnarnissamut pisuussutitsinnillu atorluannarnerulernissamut aqutaagili. Tassami pisariaqartut amerlanerit pigaavut: Pisuussutit sinnilissuit pigaavut, inuusuttavut ilinniagartuut amerliartorput, ilinniarfeqarpugut misileraasalereersunik sulilu ineriartorteqqinneqarsinnaasunik, nunanik allanik misileraavusinnaasunik suleqateqarnissamut periarfissaqarluarpugut. Taamaammat maannamiit isumaqatigiilluta aalajangerniarta suliniutinut siunnersuummi matumani pineqartutut ittunut ukiut tamarluinnaasa aningaasanut inatsisikkut immikkoortitsialerniarluta. Aatsaammi taamaaliorutta atorluannermut ingerlalissaagut, taamalu inuiaqatigiittut immitsinnut napatissinnaanngoriartussaagut.

Siunnersuut nuannaarutigalugu taperserluinnarlugulu ataatsimiititaliami sukumiinerusumik suliarineqartussatut siunnersuutiginiarpurput.